

豐凶移粟多寡預為酌定備局覆奏許之○江原監司李晚堅馳啓乞停今年  
蔚陵島搜討備局覆奏以為近年搜討不過徃見空島當此凶歲不可重貽民  
弊請姑令停止 上從之○癸酉午時 上御溫井沐頭部五百瓢沉臍下二  
刻○謝恩兼冬至使一行自燕京還渡鴨綠江平安監司以聞○甲戌坤方有  
氣如火光○巳時 上御溫井沐頭部五百瓢沉臍下二刻○乙亥午時 上  
御溫井沐頭部五百瓢沉臍下二刻○司諫李禎翊以獨停河事榆店事二啓  
而見斥於僚臺引避退待蓋二啓乃是重發之論兩禎翊欲停之書問於正言  
趙尚綱尚綱意不同要於還都後更議而禎翊遽停之尚綱以為見輕同僚言  
不見用上疏乞免禎翊乃引避處置遞禎翊○丙子午時 上御溫井沐頭部  
五百瓢沉臍下二刻○藥房入診右議政李順命同入診候畢都提調金昌集  
言連日下雨軍兵暴露多有傷病者犒軍則當待還都而不可無慰悅之舉與  
兵判李健命相議則一時餉士之需可以措辦云分付各該司措備分饋似好  
矣 上命先以牛酒分饋順命言時遣中使或兵判勞問軍中亦一慰悅之道  
矣 上命兵判先徃勞問順命曰伏見使臣先來狀啓彼中亦不能無事西賊  
侵擾調兵征討海賊餘孽叛據海島至有朝鮮亦宜嚴飭海防之語云我國於